

आकाशवाणी

- महाराष्ट्र दे गवर्नर सी.पी. राधाकृष्णन उपराष्ट्रपति दे आँदे चुना च NDA दे मेदवार होगन। प्रधानमंत्री मोदी होरें इस फैसले दा सुआगत करदे होई आक्खेया जे राधाकृष्णन केइयें बरें थमा समाजिक जीवन लेई समर्पत न।
- चुनां आयोग नै इक व्यापक जांच दे बाद 65 लक्ख मतदाताएं दे नां बिहार राज्य मतदाता सूचि च शामिल करी लैते न।
- चीन दे विदेश मंत्री वेंग यी होर अज्जै थमां दंऊ दिने दे भारत दौरै पर आवा रदे न।
- यूरोप दे केई बड़डे नेता अज्ज अमरीका च यूक्रेन दे राष्ट्रपति व्लादीमीर जेलेन्स्की हुंदे कन्नै अमरीकी राष्ट्रपति हुंदी बैठका च शिरकत करगन।
- ते नीरज चोपड़ा नै इस बरे दी डायमंड लीग फाईनल च अपनी थाहर पक्की करी लैती ऐ।

<><><><><><>

NDA-VCP Candidate

महाराष्ट्र दे राज्यपाल सी.पी. राधाकृष्ण होर आगामी उपराष्ट्रपति चुना च राष्ट्रीय जनतांत्रिक गठबंधन NDA दे मेदवार होगन। भारतीय जनता पार्टी दे अध्यक्ष ते केन्द्री मंत्री जे.पी. नड्डा होरें नमीं दिल्ली च पार्टी मुख्यालय च भाजपा संसदीय बोर्ड दी बैठक दे बाद इक संवाददाता सम्मेलन च एह घोषणा कीती। श्री नड्डा होरें आक्खेया जे NDA दे सब्भनें सहयोगियें इस फैसले दा समर्थन कीता ऐ। उनें आक्खेया जे भाजपा दा मकसद सब्भै राजनीतिक दलें दे बश्कार सहमति बनाना ऐ, तां जे उपराष्ट्रपति चुनां आम सहमति कन्नै सम्पन्न होई जान।

उनें आक्खेया जे पिच्छले हफ्ते NDA दे सहयोगिये ते विपक्षी दले कन्ने इस सरबंथे च सम्पर्क कीता गया हा। प्रधानमंत्री नरेन्द्र मोदी, पार्टी दे राष्ट्रीय अध्यक्ष ते सेहत मंत्री जे.पी. नड्डा, गृह मंत्री अमित शाह ते रक्षा मंत्री राजनाथ सिंह सने बोर्ड दे बाकी सदस्य इस बैठक च शामिल होए। उपराष्ट्रपति चुनां अगले महीने दी 9 तरीक गी होग। जगदीप धनखड़ दे उपराष्ट्रपति पद सा इस्तीफा देने दे कारण एह चुनां कराना पौआ करदा ऐ। तौंआई, NDA दे उपराष्ट्रपति दे ओहदे दे मेदवार चुने जाने पर सी.पी. राधाकृष्णन होरे गी प्रधानमंत्री नरेन्द्र मोदी होरे उनेंगी मुबारकबाद दिती ऐ। श्री मोदी होरे इक सोशल मीडिया पोस्ट च आक्खेया जे श्री राधाकृष्णन होरे सार्वजनिक सेवा दे लम्मे दौर च अपनी विनम्रता-बुद्धिमता ते समर्पण कन्ने बक्खरी गै पंछान बनाई ऐ।

<><><><><><>

PM-Vocal for Local

प्रधानमंत्री नरेन्द्र मोदी होरे “वोकल फॉर लोकल” पर जोर दिंदे होई लोके अगगे अपील कीती ऐ जे ओह भारत च बनी दिएं चीजे पर भरोसा करन ते उनेंगी खरीदिये उंदा इस्तेमाल करन। उनें आखेआ जे देसै गी मजबूत बनाने लेई इसी आत्मनिर्भर बनाना बड़ा जरूरी ऐ ते एहदे लेई चरखाधारी मोहन आसेआ दस्सी दी बतै पर टुरना बड़ा जरूरी ऐ। उनें इब्बी आक्खेआ जे औने आहले दिनें च जी.एस.टी सुधारें कन्ने देशवासिं गी दोहरा फायदा पुज्जोग। प्रधानमंत्री नरेन्द्र मोदी होरे कल नमी दिल्ली च कोई 11 जहार करोड़ रपे दिएं 2 मुख राष्ठी जरनैली शिड़क परियोजनाएं दा उद्घाटन करंगन। इन्दे च द्वारका एक्सप्रेस-वे दा दिल्ली ब्लॉक ते शैहरी विस्तार मार्ग दा दुआ हिस्सा शामिल ऐ। एह परियोजनां राजधानी दिल्ली च गड़िं दा रश घट्ट करने लेई तैयार कीतियां गेइयां न। इन्दे नै दिल्ली च आओजाई सखल्ली होग ते सफर करने च समें दी बी बचत होग।

द्वारका एक्सप्रेस-वे दे 10 किलोमीटर कोला लम्मे हिस्से गी 5 जहार 300 करोड़ रपे दी लागत नै तैयार कीता गेआ ऐ जिसलै जे शैहरी विस्तार मार्ग दो निर्माण पर 5 जहार 580 करोड़ रपे दी लागत आई ऐ।

<><><><><><>

Bihar –Electoral Roll

निर्वाचन आयोग नै बिहार दी मतदाता सूचि चा हटाए गेदे 65 लख लोकें दी लिस्ट जारी करी दिती ऐ। मसौदा सूचि तफसीली जांच ते निरीक्षण दे बाद पैहली अगस्त गी जारी कीती गेई ही। जिनें लोकें दे नां 2025 तगर बिहार दी मतदाता सूचि च ऐ हे- पर मसौदा सूचि च शामिल नैई होए- उन्दा ब्योरा बिहार दे मुख चुनां अधिकारी हुंदे दफ्तर दी वेबसाइट पर अपलोड करी दिता गया ऐ। दफ्तर आसेया जारी नोटिस च आखेया गया ऐ जे सियासी पार्टियें आसेया नियुक्त कीते गेदे बूथ सतह दे एजेंटें दी मदद कन्नै बूथ सतह दे अधिकारयें-मकामी जनप्रतिनिधियें ते होरनें अफसरें उनें मतदाताएं दी लिस्ट तयार कीती ऐ-जिन्दी पर्ची आयोग गी नही थोई ऐ। नोटस च आखेया गेदा ऐ जे कुसै गी बी जेकर कोई ऐतराज जा बेसंदोखी ऐ -ओ अपने आधार-कार्ड दी नकल कन्नै लाइयै अपना दावा पेश करी सकदा ऐ।

<><><><><><>

Election-Commission

चुनांs आयोग नै आखेआ ऐ जे ओहदे आस्तै सब्बे दल इक्क समान ते ओह राजनीतिक दलें बशकार कोई फर्कोफर्की नैई करदा। अज्ज नमीं दिल्ली च मीडिया गी संबोधित करदे होई मुख चुनां आयुक्त जानेश कुमार होरें आखेआ जे चुनां आयोग अपने संवैधानिक कर्तव्य थमां पिच्छे नैई हटोग। श्री कुमार होरें आखेआ जे किश लोकें दोहरे मतदान दा आरोप लाया ऐ पर जदूं उन्दे शा इस गल्ला दे सबूत मंगे गे ते उनें कोई जोआब नैई दिता। उनें गलाया जे चुनां आयोग ते ना गै कोई मतदाता नेया झूठे आरोपें शा डरदा ऐ।

मुख्य चुनां आयुक्त होरें स्पष्ट कीता जे चुनां आयोग बगैर कुसै भेदभाव दे गरीब, अमीर, बुजुर्ग, महिलाएं ते युवाएं समेत सब्बै वगर्गे ते सारे धर्म दे मतदाताएं कन्नै बगैर कुसा डर-त्राह दे खड़ोते दा रौहग। श्री कुमार होरें गलाया जे लोकसभा चुनां दरान इक्क करोड़ थमां बद्द सरकारी कर्मचारी, 10 लक्ख थमां बद्द बूथ स्तर दे एजेंट ते मेदवारें दे 20 लक्ख थमां बद्द पोलिंग एजेंट इस प्रक्रिया दे हिस्सा हे। उनें गलाया जे ओह जानना चाहंदे न जे इन्नी पारदर्शी प्रक्रिया ते इन्ने सारे लोकें दे बावजूद वोट कियां चोरी कीते जाई सकदे न। चुनां आयुक्त नै जोर देइयें आखेआ जे जदूं बिहार दे 7 करोड़ थमां बद्द मतदाता चुनां आयोग कन्नै खड़ोते दे न तदूं औदी विश्वसनीयता पर सोआल नेई ठोआया जाई सकदा।

<><><><><><>

Chinese FM

चीन दे विदेशमंत्री ते कम्यूनिस्ट पार्टी पोलितब्यूरो दे मिम्बर वांग-यी होर अज्जै थमां दंडु दिनें दी भारत यात्रा पर होगन। राष्ट्रीय सुरक्षा सलाहकार अजीत डोभाल हुंदे साद्दे पर उन्दी एह यात्रा होआ करदी ऐ। चीन दे विदेशमंत्री भारत दे विशेष प्रतिनिधि डोभाल हुंदे कन्नै भारत-चीन बश्कार बन्ने गी लेइयें चलदे आवा रदे- विवाद पर विशेष प्रतिनिधिमंडल स्तरै दी गल्लबात दे 24में गेड़ च हिस्सा लेंगन। विदेशमंत्री डाक्टर एस. जयशंकर हुंदे कन्नै बी चीनी विदेशमंत्री हुंदी दपक्खी बैठक लग्गने दा कार्यक्रम ऐ।

<><><><><><>

G. Krishan Reddy

केन्द्री कोयला ते खान मंत्री जी. किशन रेड्डी होरें दुनिया भर च होआ रदे बदलावें गी दिक्खदे होई निर्माण कम्पनियें कन्नै निर्माण खेतर च सिर्फ स्वदेशी समग्री दा इस्तेमाल करने दी अपील कीती ऐ।

भारतीय रियल एस्टेट डेवलपर्स संघें दे परिसंघ दे हैदराबाद प्रॉपटी शो च- श्री रेड्डी होरें आक्खेया जे हैदराबाद च निर्माण खेतर तेजिया कन्नै अगगे बद्दा रदा ऐ। उन्नै आक्खेया जे निर्माण कम्पनियें गी उपभोक्ताएं दे हितें दे अनुरूप कम्म करना लोइचदा। श्री रेड्डी होरें निर्माण खेतर आस्तै सरकार पास्सेया हर मुमकन मदाद दा भरोसा दोआया।

<><><><><><>

Zelenskiy –Trump Meet

वाशिंगटन च अज्ज यूरोप दे कैई बड्डे नेता यूक्रेन दे राष्ट्रपति व्लादीमीर जेलेन्स्की हुंदे कन्नै अमरीका दे राष्ट्रपति डोनाल्ड ट्रम्प हुंदे कन्नै बैठका च शामिल होगन। यूक्रेन च चलै करदे संघर्ष दे तौले नबेड़े लेई एह बैठक लोआई जा रदी ऐ। एहदे च बरतानियां दे प्रधानमंत्री कीर स्टारमर- फ्रांस दे राष्ट्रपति इमैनुएल मैक्रॉ- जर्मनी दे चांसलर फ्रेडरिक मर्ज़- यूरोपीय आयोग दे अध्यक्ष उर्सुला फॉन डेर लायन ते नैटो दे महासचिव मार्क रुट शामिल होगन। सोशल मीडिया पोस्ट च डोनाल्ड ट्रम्प होरें रुस बारे बड्डी पैहल दी जिक्र कीता ऐ- पर एहदा ब्योरा नेही दिता ऐ- जेहदे कारण अज्ज होने आहली बैठक गी लेइयै अटकलां क्याफें तेज होई गे न।

<><><><><><>

Neeraj Diamond

मजूदा विश्व चैम्पियन ते दंरु बारी ओलम्पिक्स च तगमा जिती चुके दे नीरज चोपड़ा नै इस बरे दी डायमंड लीग फाइनल च अपनी थाहर पक्की करी लैती ऐ। फाइनल इस्सै महीने दी 27 ते 28 तरीक गी स्विटजरलैंड दे Zurich- च खेडेया जाग।

हाल च गै सिलेसिया गेड़ च हिस्सा नेही लैने दे बावजूद- नीरज दा इस सत्र दा प्रदर्शन उन्दे फाइनल लेई क्वालीफाई करने गितै- नीरज नै पेरिस सेशन च 88 इशारिया 1-6 मीटर तोड़ी नेजा सुट्टियै जित हासल कीती- उन्नै दोहा च 90 इशारिया 2-3 मीटर दे छिंडे पर नेज्जा सुट्टियै नमां राष्ट्रीय रिकार्ड बनाया- जर्मनी दे जूलियन वेबर दे बाद ओ दुई थाहरै पर रेह। नीरज ते वेबर दौने दे 15-15 अंक न। त्रिनिदाद ते टोबैगो दे केशोर्न वालकॉट दिये त्रै स्पर्धाएं च 17 अंक हासल करियै ओ- अक्वल नम्बरै पर न। एहदे शा पैहले नीरज चोपड़ा नै 2022 च डायमंड लीग दा खताब जितेया हा। 2023 ते 2024 च ओ दुए नम्बरै पर रेह हे- अजें कि उन्नै अजें तगर ज्यूरिख डायमंड लीग फाईनल च अपने शामिल होने दी तस्दीक नेही कीती ऐ।

<><><><><><>

Weather

मौसम विभाग नै औंदे 7 दिनें दौरान गोवा- महाराष्ट्र ते गुजरात च मौलेधार बरखा बरने दी पेश गोई कीती ऐ। मैहकमे नै आक्खेया ऐ जे मंगलवार 19 तरीक तगर कोंकण ते गोवा- मध्य-महाराष्ट्र दे घाट इलाके च तेज बरखा बरने दी संभावना ऐ। अगले किश दिनें तगर दक्खन प्रायद्वीपीय भारत च बी मौलेधार बरखा जारी रौहग- जेदे च अज्ज तेलंगाना च तेज बरखा होग। समुन्द्री कंडे आहले कर्नाटक दे हिस्सें च अगले दौंऊ दिनें दौरान तेज बरखा बरने दा अंदाजा लाया गया ऐ।

<><><><><><>

Punjab Flood

हिमाचल प्रदेश च लगातार भारी बरखा ते जम्मू खिते च बददल फटने आली घटनाएं मगरा रावी ते ब्यास दरियाएं च पानी दा स्तर काफी बदी गया ऐ।

इनें दरेयाएं दे कोल रौहने आहले आहले लोकें ते पठानकोट- गुरदासपुर- कपूरथला- होशियारपुर- फाजिलका ते फिरोजपुर जिलें दे लोकें दियां मुश्किलां बढ़ीं गेइयां न। कपूरथला ते होशियारपुर च 20 शा मते ते बन्नै आहले जिले- पठानकोट च तकरीबन 10 ग्राएं दे दरियाएं दा पानी दा स्तर बढ़दने करी आम जीवन प्रभावित होआ ऐ। सैकड़ां दे साहबे बसनीकें गी आसरमें च पुजाया गया ऐ।

<><><><><><>